



Alois Poltéra, il president dalla Pro Sagogn che s'engascha pil manteniment dalla sdrema da pumera aulta da Sagogn. FOTOS S. ROTHMUND/MAD

In viva sil must da Sagogn

La Pro Sagogn vul mantener la sdrema da pumera aulta a Sagogn

DA SUSI ROTHMUND / ANR

■ La Pro Sagogn ei in'uniun fetg activa che vegn presidiada d'Alois Poltéra. Denter auter s'engascha ella pil manteniment dallasdrema da pumera aulta e per la tgira dallas 24 sorts d'orchideas da Sagogn ed ha retschert igl onn vargau per quels projects il premi da giubileum dalla Pro Natura Grischun. L'idea ei da mantener la pumera aulta ed era da nezegiar la raccolta. Per quei ha la Pro Sagogn envidau questa



jamna da raccoltar l'empreda meila en curtgins a Sagogn e varga 15 persunas da Murissen tochen Turitg ein separticipadas a quell'acziun. Avon che scurlar la puma giu dallas plantas ei vegniu segau per ch'ei mondi meglier da rimnar la meila. Da temperaturas da stad ein 28 harassas vegnidas emplenidas cun meila d'aur e Berner Rosen. La raccolta ha Poltéra transportau ella mustaria a Glion e leu ei vegniu produciu must ordlunder. Ils varga 800 kilos meila han dau rodund 500 liters da quei liquid gustus; must da meila

d'aur nunfiltrau, must da meila d'aur clar e must da Berner Rosen. Quellas treis sorts da must vegnan vendidas en «bag in boxas» da tschun liters (12 francs) ni en talas da diesch liters (22 francs), per exempel damaun a caschun dalla fiera d'atun da Sagogn. Tier la Pro Sagogn (info@prosagogn.ch) san ins era empustar il must. Culla cumpra da quel vegn il project da manteniment dalla sdrema da pumera aulta da Sagogn sustenius. Tenor Poltéra vegnan singulas boxas furnidas gratuit a Sagogn e quantitads pli grondas era el contuorn. L'autra jamna duei vegnir raccoltau meila per torrer e probablamein vegn era quei product vendius. L'entschatta october duei la secunda acziun da raccoltar meila haver liug. Era dalla meila che madira empau pli tard duei vegnir fatg in gustus must.

Cuntrada da puma

«Pli baul valeva Sagogn sco la cuntrada da puma dalla Surselva, e la gliעד dalla regiun vegneva a Sagogn per puma», ha Poltéra declarau. Aunc oz madiran leu en clima migeivel rodund 40 differentas sorts da meila. Il manteniment dalla pumera aulta ei impurtonts, era ord vesta dalla biodiversidad. Sco il president dalla Pro Sagogn ha declarau ei la gronda part dallas plantas fetg veglia, probablamein entuorn 100 onns. Oz vegni ei plitost plantau pumera bassa per quei ch'ei mondi meglier da cultivar tala. La Pro Sagogn

preveda denton da plantar nova pumera aulta. Las plantas existentas sesanflan sin 50 parcelas, per gronda part sut il vitg da Sagogn. Biaras da quellas plantas ein en possess da persunas pli veglias ni d'artavels che han buca la peda ni igl interess da cultivar ellas. Ina lavur che la Pro Sagogn surpren pils proprietaris che giavischan quei. Tenor Poltéra mira l'uniun actualmein per la pumera da siat possessurs. La primavera ein entginas plantas vegnidas tagliadas da persunas dil fatg. Per buca schar smarschir giun plaun la meila ei quella ussa vegnida raccoltada per schar far must. La Pro Sagogn vul era vender fretgs frestgs, torrer tals e schar barschar vinars. «La puma da Sagogn gusta grondius ed ei fuss donn da buca utilisar ella», ei il miedi da casa pensiunau perschuadius.

Plantar pumera

Tgi che ha l'intenziun da plantar pumera ni semplamein interess da veser tgei sorts da puma ch'ei dat a Sagogn sa visitar damaun il stan dalla Pro Sagogn alla fiera d'atun. Il pomolog Gaudenz Zanetti muossa leu rodund 30 sorts da meila e péra e declara ils avantatgs e disavantatgs da tala. Al stan po era vegnir degustau fretgs e tgi che vul sa far in viva cul ni sil must da Sagogn. Tgi che posseda fretgs e sa buca co quels han num sa purtar quels damaun al specialist che vegn a dar breigia d'eruir la sort.

www.prosagogn.ch



Da tutta calira han ei scurlau giud las plantas e rimnau varga 800 kilos meila d'aur e Berner Rosen.



Cu ei vegn scurlau eis ei meglier da star en segirtad.




A Sagogn dat ei bia meila dalla sort Berner Rosen.



Alois Poltéra, il president dalla Pro Sagogn, ei cuntents culla raccolta.



Sin invit dalla Pro Sagogn han varga 15 persunas raccoltau meila per far must.



Ernst Hess da Sagogn ha survegniu sco emprem ina boxa must da Sagogn.